



partii naleraq

14. novemberi. 2016

UKA2016/89

Meeqqat angerlasimaffiup avataanut inissineqartartut pillugit angajoqqaanut paaseqatigiiffiunerusumik suleqateqarnissamik, ersarinnerusunillu piumasaqaasiortoqartalernissaanik Naalakkersuisut suliniuteqaqqunissaat pillugu apeqquteqaat aallaavigalugu Inatsisartut oqallinnissaannik siunnersuut. Taamaaliornikkut angerlarsimaffiup qimagutsitaaffiusup nakkutigineqarluni, angajoqqaallu qaninnerusumik suleqatigalugit, angajoqqaanik siunnersuineq, katsorsaaneq allanillu angerlarsimaffiup pitsanngoriaateqarfiusumik meeqqanut angerlarsimaffimmiit qimagutsitaasimasunut piaarnerusumik angerlartitseqqinnissaq anguneqarsinnaaqqullugu.

(Inatsisartunut ilaasortaq, Anthon Frederiksen, Partii Naleraq)

Inatsisartunut ilaasortaq Anthon Frederiksen Partii Naleraq inatsisartunut oqallinnissamik siunnersuuteqarpoq, angerlarsimaffiup avataanut inissineqartartut pillugit angajoqqaanut paaseqatigiiffiusumik, aammalu angajoqqaanik siunnersuineq, katsorsaaneq, taavalu meeqqanut angerlarsimaffiup avataanut inissineqarsimasunut piaarnerusumik angerlartitseqqinnissaq pillugu, oqallinnissamut siunnersuut oqaaseqarfigissavarput.

Nunattsinni meeqqat tamarmik toqqissillutik peroriartornissaat aammalu isumassorneqarnikkut paarineqarnikkut ilinniartitaanikkut minnerunngitsumillu asaneqarlutik perorsarneqarnissaat kissaatiginarluinnarpoq. Meeqqammi peroriartortut ataqqinartumik inuuneqartitaallutik sutigut tamatigut ineriartornissaat tamatta inuiaqatigiinni pingaartillugu ilungersuuttariaqarparput.

Meeqqat angerlarsimaffiup avataanut inissineqartartut nunattsinni amerlavallarujuussuarput tamannalu ajorluinnarpoq allanngortitariaqalerluni.

Pissuttsit ukiuni makkunani atuuttut allanngortinneqassappata taava sullissinerput allanngortilluinnartariaqarparput. Pisortat siusinnerusukkut akuliussinnaanerat annertunerusumillu suliniuteqarnerit ingerlattariaqarput, tassalu meeqqat angajoqqaallu ataatsimut sulissullugit, tamannalu kinguneqarluarnerussasoq takusinnaavarput, tassami angajoqqaat meeqqamik meeqqanik arsaaginnarlugit ajornartorsiutaat qaangerneqarnavianngimmata.

Meeqqat ajornartorsiutaat sumiginneqarnerilu millisarneqassappata angajoqqaanik sullissineq nukissaqarfigilluartariaqarpoq, massakkummi amerlasuutigut angajoqqaat taakkua qaangiinneqartarput ilaatigut isumaginninnikkut sulisussaaleqineq pissutigalugu.

Meerarmi angerlarsimaffimminut utissapat angerlarsimaffik tamakkiisumik suliaralugu aallartitariaqarpoq ajornartorsiutinillu ikiuinissaq annertuumik ingerlattariaqarpoq, meeqqammi peroriartornermini angajoqqaat asanninnerat pakkunneqartarnerillu pisariaqartilluinnarmagit.

Angerlarsimaffiillu sullinneqanngittsut suliarineqanngittsullu sullinneqartariaqarput, taamaattumik sulisussanik pikkorissaanerit aammalu ilinniartitsinerit annertusartuartariaqarput, aammalu ulluinnarni sulinikkut isumaginninnermi atugassarititaasunik pitsanngorsaasoqarnissaa saneqqunneqarsinnaanngilaq, assersuutigalugu aamma isumaginnittoqarfimmi sulisut aningaasarsiaat eqqarsaatigalugit naleqqussaasoqartariaqalerat.

Nalunngisattitulli tamanna namminneq kattuffiisa suliassarigaat ilisivarput. Isumaginnittoqarfimmi sulisunut pitsanngorsaasoqarani aningaasarsiatigut taamatut inissisimasoaannarpat pissutsit illoraap tungaanut aallarnissaat ilimananngimmat, tamassumalu kingunerissavaa sulisoqarnikkut angusaqarnissaq suli killeqartuassammat.

Meeqqanik sumiginnakkanik inissiisarneq aamma allanngortitariaqalerpoq, meeqqat ingerlaannavik angajoqqaaviniq peersinnagit angajoqqaavi peqatigalugit ikiorsiisarnissat ingerlasariaqarput ilaqutariit ikiorserneqassappata meeqqanik arsaarinnittarnerit minnerpaaffianut inissinneqartariaqarput ilaqutariimmi meeqqanik arsaaginnarlugit ikiorserneqarnavianngillat.

Aammalumi qujassutissaqarpugut innuttaasunut amerlasuunut tassalu angajoqqaarsiarpassuit meeqqanut ilungersorlutik sullissisut, inuiaqatigiit meerartaasa suliniarfigineqarneranni sulissilluarnissinnut qamannga pisumik qujanaq.

Qujaneq kisimi naammanngilaq angajoqqaarsianut atugassarititaasut ullumikkorniit pitsaanerulertariaqarput. Paarsinersiutit naleqqussaaffigisariaqalerput ullutsinnut naapertuunerusumik atugassa qarfiusussanngorlugit.

Meeqqanik paarsaqarnermi aningaasat tigusartakkat, aamma akit qaffakkiartornerinut malinnaasariaqarput, aammalumi ulluttinnut naleqqussarnerqarlutik, tassami ilaatigut paarsaqartunut oqittsuinnaanngitsumik atugassa qarfiulersarput, naak pisortatigoortumik piunaffigineqarnikkut meeqqanik paarsaqarnerminni sullissigaluartut.

Kiisalu paarsaqartunut qanittumik suleqateqarnissaq, paarineqartullu inuttut killiffiiniq paaseqatigiittarnissaq pingaarluinnartoq naammassineqartassasorlu kissaatigaarput.

Tassami ilaatigut naammattoorneqartarpoq meeqqanut paarsisunut meeqqanullu ilisimatitseqqaanngivilluni angerlatitsisarnerit, tamannalu paarsisartunik toqqissisimanarineqanngilaq, allaallu misigisimasarlutik sooruna ilisimatinneqaratalu allamut nuussisoqartoq, tamannalu meeqqanut paarineqartunut toqqissisimaleruttortunut aamma sunniuteqarnerluttartoq angajoqqaarsiat oqaatigisarmassuk.

Kiisalu angajoqqaanngortussat sillimaffigisassaannik siusinaatumik
siunnersorluarneqartarnissaat pikkorissarneqartarnissaallu aallulluartariaqarparput,
sapinngisamillu meerartaartussat piareersimallutik angajoqqaanngornissaat aammalu
meeqqanik perorsaanerme aallartilluarnissaat pingaarluinnarmat.

Naalackersuisut akissutaani takusinnaavarput meeqqanik ilaqutariinnillu sullissinissaq,
pineqartut qanimut peqatigalugit ingerlanneqartalissasoq oqaatigineqarpoq. Tamannalu
inatsisartut inatsisaatigut nutaamik saqqummiunneqartussaq pissangalluta utaqqissavarput.

Anthon Frederiksen-ip Partii Naleqqameersup, meeqqat pillugit oqallissaarutaanut
qujavugut, naggataatigullu neriulluta siunissami meeqqat tamarnik toqqissisimasumik
perorriartortinneqartalerumaartut, angajoqqaallu akisussaaffimminnik paasinnilluarlutik
perorsaasalerumaartut, upperaarpullu inuiaqatigiit kalaallit nukittuut
pilersinneqarqikkumaartut.

Henrik Fleischer